

Sèrmon po l' mèsse dès fièsses di Walonîye  
Djiblou, 27 di sètîmbe 2009

Mès Djins,

Li solia lût po tortos, mins ça n' plaît nin todi à tot l' monde !

Vos v'noz d'ètinde Djan, l'apôte qui Nosse Sègneûr vèyeut l' pus voltî.

I fait d' sès rinquinquins, l'ome ! Tot ça pace qu'il a vèyu one saquî qui fieut do bin, mins qui n'èsteut nin d' leû soce.

« Ça n' pout nin yèsse ! »

Èt Jésus de l' disminti ossi rade èt l' rimète à s' place : « Li cia qui n'èst nin conte nos-ôtes ni pout yèsse qu'avou nos-ôtes ! »

Là, tin, one bèle lèçon qu'i nos faurè rit'nu ! Èt nos policyins sont bin mètus po l' sawè :

- S'on r'fait lès vòyes dins on quârtier de l' comene, tot d' chûte lès cias d'one miète pus lon, ossi rade di s' mwaîji èt di d'mander : « Poqwè nin d' nosse costé ? »

- Si nos vèyans one saquî qui fait plaîji à onk ou l'ôte, vo-nos-là ossi rade djalous come on tigue : « C'èst po s' fé valu qu'i fait ça ! Ci n'èst qu'on grandiveûs, on pèle-chochin ! » Èt nos l' riwaîtans d'on laîd ouy ...

Portant, ni sèreut ç' nin Nosse Sègneûr qu'aureut raîson ?

Tos lès côps qu' nos-èstans à rinde sèrvice, ni sondjî qu'aus-ôtes èt d'mèrer drwèts dins nos botes, tos lès côps qu' nos douvians nos-ouys èt waîtî qui l' cia qui boute eûche tofêr li dêrin franc què lî r'vint, n'èst ç' nin on bia djoû d' solia po tot l' monde ?

Come sint Djauke nos l' rapèle dins l' prumêre lècture : « Ci n'èst nin avou vos bias mousemints tot mougûs paus motes, ou bin avou voste ôr èt voste ârdjinterîye tote èrunîye qui vos mousseroz au paradis ! ».

Et Nosse Sègneûr va co pus lon. Nos pôrins pinser qu'i crîye fwârt quand i cause di pîre di molin qu'on lôye au cô do mau-fiant ; oubin quand i prétind qu'i faut côper one mwin, on pîd, on-ouy qui vos mètret à mau.

Bin sûr qui nos n' tinans nin d'yèsse mètus dins l'infiêr, mins faut-i justumint payî ç' pris là ?

Portant, si nos mwins, nos pîds, nos-ouys faîyenut d' nos-ôtes dès djins à deûs visadjes, si nosse consyince dimère trop tène, si nos n'èstans nin à tch'vau su nosse prumêre minte, si nos mostrans todi aus-ôtes one tièsse come on-uch di grègne, si nos rindans todi grète po grète, si nos n' savans nin d'dja d'ner l'aîwe qui n's-avans fait cûre nos-ous, ci n' sèrè nin insi qui l' solia pôrè lûre dins nos keûrs.

Jésus aureut p'lu dîre li min.me avou nosse linwe. Si nos-èstans todi à discauser l's-ôtes èt fé pèter nosse linwe di tos costés, si nos l' lèyans couru come one lavète au cu d'on pot èt mète tot l' monde à l'abat, c'èst l' vraî qu'i l' vaureut quètefiye mia côper.

Mès djins, mètans nos pus rade tortos èchone po sèmer l' bin. Nos n' sèrans jamaîs assez po bouter po qu' nosse planète toûne one miète mia.

Et surtout, ni purdans jamaîs l's-ôtes po mwins' qui nos-ôtes.

Dj'a cor one pitite saqwè à vos dîre ! Nos-èstans quausu tortos véci d' Djiblou. A Djiblou, dispeûy longtîmps, gn-a l'Agronomîye èt nos 'nn'èstans fièrs.

Mins audjoûrdu, nos sondjans surtout à nos cinsîs. Dji sé bin qu'on-z-a l'abitude di dîre qu'i s' plindenut tofêr, qu'i n' sont jamaîs contints.

Mins ç' qui nos-avans vèyu d' cès djoûs ci avou l' lacia, c'è-st-à braîre !  
Rapelez vos ç' qu'on fieut dins l' timps :  
Tot timpe au matin, on-z-aleut qwêre li lacia à l' cinse. On l' fieut boûre su li stûve.  
Gn-aveut, adon, one bèle sipèsse crin.me qui s' vineut stinde dissus.  
On fieut one potéye dins one grande jate avou do pwin rassî, èt on vièrseut l' lacia tot  
bolant, èt s' bèle crin.me... avou do suke. Qui c'èsteut bon !  
On saveut bin, adon, qui l' cinsî èsteut là po nos fé viker. Asteûre, si nos lès lèyans  
fé, c'èst tos lès ramonceleûs d' caurs què lès vont spotchîs.  
Ci n'èst nin possibe, don ! I n' l'èpwateront nin o paradis !  
Qui le solia do Bon Diè r'glatice dins l' keûr di vos-ôtes tortos.  
Et cor one bone fièsse di Walonîye.

André Ferard